



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 3

Meghalaya nung taoba Chief Minister D.D. Lapang süogo

Tourism sector ajungkettsütsü atema inyaktsüla: Shashi Tharoor

VOL. XXII ISSUE NO. 331 (ADOK 331)

DIMAPUR

AMUNGNÜ (SUNDAY)

RONGJUI (SEPTEMBER) 14, 2025

₹ 5.00

NH29 ya 'December Highway' masü 'all-season highway' asütsüla: CNCCI

Dimapur, September 13, 2025

(TYO): Nagaland nung National Highway 29 dang "December Highway" ta ajar kechiyong küm piyong iba lenmang mejungi dang liaka sorkari Hornbill Festival aser Christmas shopping atemabo lenmang jungjunga yangludaktsür.

Nagaland nung gari lenmang tejentiba aser tongtipangbaji National Highway 29 lir aser iba ajanga Dimapur den tanüngba district tem aser Manipur state den sendakteper ta

Iba lenmang nung khu abenba garitem kanga timtema senzür aser war zone ka nung tanks aser military equipment bener senzür amai bilema longkhu shia lendong ajurutsü asü ta tsübuseta senzür.

Iba lenmang nung garitem raksaba, mapang talila agiba aser osettsüset raksaa endokba ajak bendenra sen crore noklang aika akoksar. Talisa nübertemi emergency medical teyari nüngdakba mapang kanga timtemer ta Confederation of Nagaland Chamber of Commerce and Industry (CNCCI)-i

metetdaksüogo.

NH-29 nung mapang shia khuretem ajuruba ya alinük majungba ajanga ta ashir saka asenok kidanger state tem-Mizoram, Manipur, Arunachal Pradesh, aser Meghalaya nunga kasa alinük lir saka parnokibo lenmang kanga junga yanglua lir aser kümpiyong timtemmeliü dang senzüsönbonger ta CNCCI-isa ashi.

State sorkari NHIDCL nem tai tonglokttsüsü merangtsü akok saka iba tebilemtsü ya sorkar dak keta lir kechiyong sorkari tenük meyoker aser mapang talangka alitsüsa sentongtem meyanglur ta Chairman Dr. Khekugha Muru aser General Secretary Avi Chase nati sangdong nung ashi.

Iba December Highway ya all-season, four-lane highway ka ama yanglutsüla. Anungji state sorkar, MORTH, NHIDCL aser sendaktepa alir ajaki mapang talangka timtema aruba tebilemtsü ta agentsü atema mapa inyaktsü ayongzüker ta CNCCI-isa metetdaksüogo.

Hornbill Festival nem Heritage Award agütsü

Dimapur, September 13, 2025

(TYO): September 13, 2025 nung New Delhi nung THE WEEK, Heritage Awards ajanga Hornbill Festival, Nagaland nem 'Silver Banyan Award for Best Cultural Music & Dance' agütsüogo.

Joint Resident Commissioner, Nagaland House New Delhi, Sharon Longchari-i Nagaland tenung nung Union Minister of Culture and Tourism, Gajendra Singh Shekhawat ket nung iba sempet agizüka liasü.

Linük senmang aser sobaliba

kümzüka ayutsü, wazüka ayutsü aser ajungkettsü atema Heritage Awards agütsür ta PRO Nagaland House, New Delhi-i sangdong ka nung ashi.

Iba award ya telemsa balala yur agütsür aser itemji Historical Tourism Award/ Heritage Tourism Award, Riverside Heritage Tourism Award, Best Tourist Circuit, Pilgrimage and Spiritual Tourism Award, Traditional Skills Award, Best Cultural Music & Dance Award, Best Travel Operator, Best Advertising Agency aser Best Creative lir.

PM Modi-i Manipur semdangba atema nübor tangatetba balala

Churachandpur/Imphal, September 13, 2025 (Agencies):

Manipur nung May 2023 nungi kin o kin tsüngda mepetmesü adokba sülen Prime Minister Narendra Modi-i tang mezüing atema Manipur semdangba atema nübertemi tangatetba balala metetdaksüogo.

Meitei aser Kuki-Zo nung aser political party balala nungi nübertemi tangatetba balala liasü. Kari PM Modi-i semdangba pelaa agizük saka karibo pai menur ang semdangba atema mepelaba metetdaksüogo.

PM Modi-i Manipur semdangdang Kuki-Zo nung teimba ser aliba Churachandpur aser Meitei nung teimba ser aliba Imphal semdanga liasü. Tanü pai Manipur nung Rs 7,300 crore alang mapatong inyaktsü atema lung azünga yutsüogo aser ano Rs 1,200 crore alang mapatongtem lapoktsüogo.

Manipur nung kin o kin

tsüngda mepetmesü adokba ajanga nisung 60,000 jungnüa pei talidak toktsür aotsüsa aküm aser tanü Modi-i parnok yaritsü nangzüik.

Paisa nübertem dang ozüing alema inyangshiba anentsü aser state nung yimjung, terenlok aser azükaru bener arutsü atema mepishia metetdaksü.

"PM Modi-i semdangba ajanga yimjung aser terenlok bener arutsü. Tesem anaprong Churachandpur aser Imphal nung public aika adenshiba ajanga nübertemi PM Modi meimba sayuogo" ta Bharatiya Janata Party (BJP) lennir aser taoba chief minister N Biren Singh-i ashi.

"Manipur tensa majungba agi pai taoba nung marutet saka mapang shitak nung pai state semdang" ta Biren-isa ashi.

"Manipur nung alirtemi Modi onük nung temulung masür" ta Congress legislative party leader aser taoba chief minister Okram

Ibobi Singh-i ashi.

"Mapatong kar lapoktsüba aser lung azüntgtsüba junger saka nübertem aser talisa internally displaced persons (IDPs) mepelar. Nübertemi PM Modi-i state semdangi arutsü mapang talangka yongya ataogo saka pai IDPs parnok kidangi meyipa aotsü indang osang tejangja mashi" ta Ibobi-i ashi.

"Modi-i Manipur semdangba ya imlaba ama masü aser tang tebilemtsü ajurua aliba nung yimjung bener arutsü ta agizüktsü makok" ta Meitei civil body All Manipur United Clubs' Organisation (AMUCO) President-i ashi.

"PM Modi-i Manipur nung alirtem aser talisa Meitei nung taginüba metongtsü. Meitei nung free movement akhangar saka pa onük nung iba ya medensem" ta AMUCO President-isa ashi.

"Mapatongtem lapoktsüba mesüra lung azünga ya sorkar

ka teinyaktsü lir. Modi mesüra tashi nung alir kari iba mapa ya inyaktsü akok. Prime Minister-i Manipur nung yimjung bener arutsü tebilemba nung maru" ta paisa ashi.

Külen, Kuki-Zo nungertemi PM Modi-i semdangba ya otsüsütsü ka lir ta ashi aser parnoki separate administration akhangba agütsüshiogo.

Churachandpur nung Kuki-Zo Council (KZC)-i PM Modi nem iba dak sendakba memorandum ka agütsü.

"Küm aika onoki Manipur nungi balaka razüka aotsü takhangba agüja arur. Constitution of India nung Article 239A kübok onoki Union Territory with legislature meshir" ta memorandum nung shia lir.

"Iba takhangba ya onok ayongayonga alitsü atema masü saka nüngdakba agi meshir. Ozü nübor yimjung, lendong nungi

ajangzütsü asoshi inyaktsüla, ta paisa ashi. Ammang nung milenbong ka agi tesangwa yaloktsüba ama asenoki inyaka sayutsüla, ta paisa shisem.

Tanü Nagaland nung tebilemtsü aika lir, item ajakji asenoki meteta dang lir, anungji, asenok ya solution bushiba nung lensayur kaka asütsü asoshi pai ayongzüik. "Naga nungeri asenok dak teimla tulu lir, anungji, aji asenoki tongtsütsü merangtsüla", ta paisa shisem.

Lokti ka tentettsübo melamelar, saka tenteter asenoki kechi inyaker ta asübaaji tongtibangba. Iba yabo atangji nung mapa küma inyakba telok ka sütettsüsa inyakdaksünür aser ketdangsür shirnoksa shimdir, parnok nem dang khuret ajak menunglokttsü asenok ajak shilem lir ta tangatetba nung akok tashi maparen ajak nung nungittsü asoshi paisa ayongzüka jembi.

Ao Senden tir, Marsanen Imsongi mapang tatsüka agidang, Ao Officers' Telungjem tentetba ya Ao kin asoshi anü tasen ka adok ama aser tongshi tulu ka meso amato lir. Iba temoatsü ya Ao kin dang masü Naga nung aser ajak agitsü imlar, ta pelaba olen ka metetdaksü.

(Maneni tapak 6 nung...)

Ao Officers' Telungjem tenteta mezüing senden meraketa kaogo



Tongti shilem agirtem den Ao Officers Telungjem Senden ayongertem den Ao Senden anir mulungtet telok balala nungi ketdangsurttem külemi tangokba noksa angur.

Mokokchung, 13th September

(TYO): "Kü lima, kü khu" omen dak rangloker Aor tulurtem ajak adenba sabang ka Ao Officers' Telungjem (AOT) tenteta mezüingbuba senden 13th September, 2025 nü Mokokchung town hall nung mungogo. Iba sentong ya Ao Senden aküm nung Kohima Ao Officers-tem Telungjem, Mokokchung Ao Officers Telungjem aser Dimapur Zone Ao Officers' Telungjem lungjemer ayongzüik. Iba sentong nung Nagaland aser India tesem balala nungi Aor tulurtem noklang tenet dak tali adenshia shilem agia aden.

Tanü iba sentong nung NLA Speaker, Sharingain Longkumer-i tajungshi o jembidang, iba telok yagi Ao lima aser Ao kin asoshi dang masü saka Naga nung rangben ajungtsü tangatetba nung inyaktsü ajungshia liasü. Tesüiba mapang asen tsüraburia Naga kin songjen asoshi inyaker aser tanü putuia iba khuret aser shilem angateta maneni inyaktsü paisa shisem.

Paisa Ao officer-tem nem inyakdaksünüba o kar lemsatepdang, tesüi otsütem kangabo lephsia mejembitsü saka teimla, tangatetba aser asendenshiba nung ajemdaker

nükmen tasen ka yanglur apusotsü, nükmen tasenji "Viksit Bharat 2047" dak rangloker Nagaland aser Ao lima jenjang kabo tongtettsüsa nukla yur inyaktsü, aser Census mapa ochi shia aser Mokokchung district menden 10 yabosa wazüka yutettsüsa lungjemer inyaktsü ajungshia liasü. Parliament mendenbo melenshitsü osang lir saka state assembly menden melenshitsü (delimitation atema) tang tashibo kecha osang mangazüker, ta paisa jangjashitsü.

Sentong nung Nagaland Chief Secretary, Sentianger Imchen, IAS-i tayongzüka o jembidang, asenok lungjema lira yangji temoatsü aika sentaka lir ta ashi. Tanü iba telok tentetba ya tangar kar indang rakzükratemtsü mesüra kar anema tokteptsü asoshi tenteter masü, saka asenoka tangar amaji kechi tim aser tangutsü lir, itemjibo tasü itta aser pei lima asoshi noktaksüla, ta ashi.

Aor ya Tsüngremi maongka tama agütsüba kin lir, yamaji asenok khuret-a aika sentaka lir, tangar dang nungi tashi temetet nung süshia mesüra ajangashiba nung süshia asenok dak teimba lir, anungji, item shisatsü aser tashi temetet jagi Naga nung arok

jenbua alitsü aser liyonga aotsü atema iba takhangba agütsür. Tekaratiba nung lemtet ka agitsü atema sorkari political dialogue agitsü ayongzüker" ta Kuki-Zo Council-isa metetdaksü.

"Kuki-Zo nung aser atema senotsü tera dang lemozütsüba atema mepelar. Meitei aser Naga nung den medemdangra onok nem sen tera dang lemozütsü" ta KZC spokesperson-i ashi.

Külen, Manipur nung Congress lanur lennirtemi tanü Imphal nung Prime Minister Narendra Modi anema lungkak aitogo.

Parnoki "burning Manipur" noksa ka yanglur Kangla Fort tsütsü aotsü merang saka parnok police-i sot.

Congress lanurtemi Narendra Modi dang "most merciless Prime Minister of India" aser Home Minister Amit Shah dang "most merciless Home Minister" ta shia lungkak ait.

FAC nung Inter-School Quiz tetoktepba ayongzüka agiogo



Dimapur, Rongjui/September 13 (TYO): Fazl Ali College, Mathematics Department-i ayongzüka September 12 nü anogo ka atema Inter-School Quiz tetoktepba ka ayongzüka agiogo.

Iba tetoktepba nung Eden Academy, GHS Chuchuyimpang, Jubilee Memorial School, Lady Bird School, Model Higher Secondary School, Queen Mary Higher Secondary School, Straightway Higher Secondary School, aser Town Higher Secondary School nungeri shilem agia liasü.

School shia nungi Class 9 aser 10 nung azünger kaketshir ananai shilem agi aser parnok meina tesayur kaka arua liasü.

Tetoktepba ya B.Sc. 5th Semester (Mathematics) kaketshir Imlimenla lenisüba nung sentong tatsüka agir tenzük. Sentong nungsa Assistant Professor, Department of Mathematics Merenlemla Jamir-i, tetokteperter aser tejaokertem pelashishia agizük aser iba sülen Vice Principal, Mr. L. S. Vinod Kumar-i o tatsüka jembia liasü.

Quiz tetoktepba ya Quiz Master, Department of

Mathematics tekolakba Watitoshi Ao-i achaayanga agi, kong round balala nung kaketshirtem mathematic dak sendakba nung parnok shisatsü, parnoki koda kara bilemteta telangzüba agütsür aser teamwork tendanga liasü.

Tetoktepba ya Queen Mary Higher Secondary School-i akok aser Straightway Higher Secondary School aser Lady Bird School na tanabuba aser tasembuba jenjang nung liasü.

Iba tetoktepba ajanga lanurtem nem parnok sempet sayatsü, longjemer inyaksü asoshi sabang tajung ka agütsüogo.

Kohima DC-i Phesama anasa gari senzügenpong lapoktsüba metetdaksü

Dimapur, Rongjui/September 13 (TYO): Kohima Deputy Commissioner, B Henok Buchem NCS-i sangdong ka ajanga, Phesama anasa Chainage: KM 192.050 nungi KM 192.150 tsünga NH-2 (Kohima nungi Mao) nung tetuyuba tesashi kar kübok lenmang raksar aliba shilem ka lapoktsüba metetdaksüogo.

Lenmang yanglushia aliba kecha tetsükdaksü madoktsü atema iba lenmang nung anogoshia anepdang 10 ako nungi nikongtsütsü 2 ako tashi gari senzügenpongtsü memelaba metetdaksüogo. Maneni tzunglu kanga sashia aruba mapang gari senzügenpongtsü memelatsü, kechiyong anentsüh alutsü ana nung lir.

Kasa mapang nung military aser para-military garitemi tetuyuba sülen manidakba aser iba ajanga gari senzügenpong nung tetsükdaksü adokdaksüba den lenmang yanglushia aliba nunga timtem adokdaksüba indang district ketdangsürtemi angzükogo, ta DC-isa metetdaksü.

Anungji, tetutyuba tejangia ka magütsü tashi military aser para military tem densema gari kecha anogoshi anepdang 10 ako nungi nikongtsütsü 2 ako tashi iba lenmang nung senzütsü memelatsü, ta metetdaksüogo.

Ken o dak sendaka aliba ketdangsürtem dang nüburtem kümzüka toktsütsü aser mapa takaratiba nung tembanga inyaksü asoshi tetuyuba sülen tashi anga anidaksü metetdaksüogo.

DC den anogo ka sentong Kohima nung ayongzüka agiogo



September 12 nü DC Office, Kohima nung Deputy Commissioner Kohima B Henok Buchem, ketdangsürtem aser kaketshirtem tangokba noksa nung angur.

Nagaland Pradesh Congress Committee-i asükh lemsatep

Dimapur, Rongjui/September 13 (TYO): Nagaland Pradesh Congress Committee (NPCC)-i sangdong ka ajanga, Veteto Lasuh September 13 nü ajungbena asüba osang angazüka mang ayimba lemsatepogo.

Veteto Lasuh ya tatishitsü tajung akteba lenir ka aser bendanga agütsüba Congress züngsem ka liasü, shibai party masetshi-i tenzükogo aser pa NPCC tatong tir ama tenzüka

aliba mapang iba lima nungi pilaogo. Pai party asoshi kechisa inyakteta toktsüogo item ajakji teti menunga bilemtettsü, ta kasa sangdong ajanga metetdaksü.

State nung party mezüng mezüng tetsüng ayaoka shilem agiba mapang pai tongtibang shilem agia 1982 küm pa 17-Chizami A/C nungi Congress candidate ama toktepa liasü.

"Pa maliba kanga metettsü aser pai toktsüba tawa ya

süngdaksütsü asoshi tasak asütsü. Ajisüaka pai inyakteta toktsüba mapang tajungtem yagi onok teti ajungmesotsü aser len anitsü," ta Working President Khriedi Theunuo-i ashi.

NPCC-i, par kibong den asükh lemsateper. Tulusang Tsüngremi pa tanüla moajang aser teti tatem makadak anisüngzükdakjang ta sarasademsü, ta paisa metetdaksü.

BASN aser district partner tem tesendaktep akangshir



Kohima, Rongjui/September 13 (TYO): Beauty & Aesthetics Society of Nagaland (BASN)-i ayongzüka September 13 nü Symphony Café, Kohima nung parnok indang district partner tem den senden tongtibang ka menogo.

Parnok tsünga tang maparen balala longjemer inyaka aliba lepa repringshitsü aser taruba beauty pageant season atema sentong tasen yanglutsü asoshi iba senden ayongzüka mena liasü.

Senden ya BASN tir Mele Pucho lenisüba nung agi, koba partnership contract nung officially sign sütepba mapang state aser district partner tem

tesendaktep akangshitsü asoshi rangloker agia liasü.

Pucho-isa, Nagaland nung pageantry tarutsü asoshi pa nülla lemsatepba den lanurtem anitettsü aser national jenjang nung shilem agia wangshidaksütsü asoshi parnok nem maongka agütsütsü atema district representatives tem ajungshi.

Pai, sentong tajungba ayongzüksü aser nübur timba nem jangjadaksütsü asoshi state ajunga nung beauty pageant tem streamline asütsü nüngdakba lemsatepa liasü. Senden nung district partner temia shilem tajung agia, pageantry jenjang ajungketsü aser tejangrartem atema maongka tali agütsütsü asoshi

parnok tebilembatem lemsatepa liasü.

Senden nung partnership lepa repringshiba den kümtem tsünga agiyonga aotsü aliba sentongtem atema sensak asem aser tebilemba balala benoka sensaksemogo aser iba ajanga taruba pageant season takok nung agiyonga aotsü asoshi inyakyim shitak asateta yuogo.

BASN aser parnok partner temi iba telongjem ajanga Nagaland nung pageant sabangtem asüngtettsüba dang masü saka local lanurtem state adena or sabang tuluba nung tokteptsü asoshi lenmang lapoktsütsü ta temulung lema bilemba lemsatepogo.

Dimapur, Rongjui/September 13 (TYO): Kaketshirtem nem district administration inyakyim metetdaksütsü aser parnok ajungmesotsü nükjidong nung Kohima Deputy Commissioner B Henok Buchem, NCS-i September 12 nü "Deputy Commissioner den anogo ka" ta nüngja agütsür sentong ka ayongzüka agiogo.

Mezüngbuba batch nung Dr. N. Kire Government Higher Secondary School nungi kaketshir parnok pongui DC Office, Kohima semdang aser public service aser governance dak sendakba nung tangazükba agütsütsü asoshi apiteta yangluba sensaksem sentong nung shilem agia liasü.

Sentong nung kaketshirtem DC Buchem, administrative ketdangsürtem, district ketdangsürtem, Kohima Press Club züngsemtem aser Nagaland Pollution Control Board nungi ketdangsürtem den sensak asem maongka ngua liasü.

Buchem-i, bureaucrat tem shirnoki tetsükdaksü balala ajangtet, maneni ajemalua alir aser tanen makai meranga inyakba ajanga takok tajung ngutet, parnok indang otsü

lemsatep. Paisa, meranga inyaksü, akoktsü ta bilemba tebilemdangba aliba, anema alitsü aser lenisütsü asoshi sempet alitsü koda tongtibang iba indang lemsatepa liasü.

Iba sentong ayongzüka agiba indang lemsatepba mapang Buchem-i kaketshirtem dang parnok lenmangtem yanglushitsü aser pei kibong tia kechi südir süang item ajak toktsür temaba jenjang tongtettsü atema nükjidong ayutsü ajungshia liasü.

Sentong ya lanurtem pei sasa dak temulung lemteta küm daksütsü, parnok mangdang ulushitsü aser public service nung career yanglutsü atema tejangraba ka adodaksütsü nükjidong nung iba sentong ya ayongzükogo.

DC Buchem-i ayongzükba iba sentong kübok mapang ka nung Kohima district kübok nija aser sorkar school tem nungi takok tajung anguba aser tejangraba aliba kaketshir pongungu shimer. Iba ajanga district administration inyakyim aser local level nung yimsütsüba indang parnok tsüngtong oa ajangshitsü asoshi maongka agütsür.

Kaketshirtem tejangraba tulu nung iba sentong nung shilem agiogo.



September 13, 2025 nü Mumbai nung Skål India National Congress 2025 sentong tenzükja Congress MP, Shashi Tharoor-i milen tsüklokdang tangokba noksa nung angur. Kasa noksa nung BJP lenir, Maneka Gandhi-a angur.

Tourism sector ajungkettsütsü atema inyaksüla: Shashi Tharoor

New Delhi, Rongjui/September 13 (Agencies): Honibarnü Congress MP, Shashi Tharoor-i, India ya tetsürtem kümzüka alitsü majungba linük ka ama züngshir, anungji linük nung tourism sector tashi itdaksünüra iba tebilemtsü atema inyaksüla, ta ashi.

Tharoor-i, "Asenok teinyaksü mapa aika lir. Tourism sector ya kanga tongtibang. Iba sector ajanga nübürtem nem mapa aika agütsür. Iba sector ajanga sorkari saru aika angur. Asenok infrastructure tajungba akümtsü nüngdak. India ya tetsürtem atema majung ta tangari züngshir. Iba tangatetbaji melenshidaksütsü nüngdaker. Iba atemaji asenoki langka inyaksüla. Tourist tesemtem nung tetsür police aika

lemzüksütsüla," ta ashi.

Congress lenirisa, linük nung mapa manguba tebilemtsü ajemtsü atema tourism sector ajungkettsütsü asoshi inyaksüla, ta ashi.

"Tourism ya kanga tongtibang onük ka lir, ibayongji tanü ni yangi (Mumbai) lir. Iba sector ajanga mapa manguba tebilemtsü densema tebilemtsü aika koktettsü. World Tourism Organisation indang report ka ajanga ashiba agi, manufacturing nung dollars sen 1,000 indokba ajanga nisungtem nem mapa agütsüba den medemdangra tourism sector nungbo dollar sen 1,000 indokba shia 8 ben agi tali mapa agütsütsü," ta Tharoor-i metetdaksü.

Tharoor-isa raliwalirtem atema mid-range facilities peria maliba metetdakja, "Asen linük

nung 5-star hotels mesüra facility kanga majungba hotels lir. Ana tiyongsü nungji mid-range hotels mali," ta metetdaksü.

Mumbai nung Skål India National Congress 2025 sentong nung adenba sülen osangbenertem den jembidang pai, India den medemdangra Dubai aser Singapore ama linük tilatemi ang bendanger raliwalirtem teimba puar, ta ashi.

"Asenoki hotels noklang aika, hotels meyirjang aika tali asütsü nüngdaker, asenoki tourist facilities tajungba agütsütsü nüngdaker, asenoki nisung teimba puatsü nüngdaker. Alima nem agütsütsü asoshi linük tepor tajung ishika dang lir. Asenoki tourism ajungkettsütsü atema tongtibang süa inyaksüla," ta paisa shisem.

India-i Palestine dak sendakba UN bangzüng ka pusema vote agütsü

New Delhi, September 12 (Agencies): Hokolbarnü UN General Assembly-i Palestine nung yimjung aser linük ana atema benokba New York Declaration agizükogo.

UN bangzüngji pusema vote agütsürtemji India densema linük 142 liasü.

UN bangzüngji pusema linük 142-i vote agütsü, linük 10-i iba bangzüng anema vote agütsü aser linük 12-ibo vote magütsü.

Israeli-Palestine mangatettep ken o dak sendakba nung India-i mapang talangka nungi linük ana tenteta Palestine ya temeja linük ka akümtsü pusemer.

UN nung vote agütsütepba

sülen France Tir Emmanuel Macron-i X ajanga, "Tanü France aser Saudi Arabia nai benokba nung ajemdaker linük 142-i 'New York Declaration on implementation of the two-State solution' agizükogo. Middle East nung yimjung atema onoki longjemer lenmang bushitsü," ta metetdaksü.

Macron-isa, "Ni Crown Prince of Saudi Arabia den jembiogo. Longjemer onoki September 22 nü New York nung Two-State Solution conference ayongzütsü. America-i Palestine ketdangsertem nem visa magütsütsü telemteba agiba ya

tim masü. Onoki iba telemtebaji reprangshitsü aser Host Country Agreement kübok Palestine nung ketdangsertem agizüktsü mepishir. Onok nükjidongji tejangja- linük ana tentettsü atema linüktem teyari bushitsü. Ibaji ajanga dang Israel nung aser Palestine nung naprongla taginüba ataloktsü," ta metetdaksü.

Macron-isa, iba conference nungji teti atema rara anentsü, pua alirtem ajak chioktsü, Gaza nung nem teyari agütsüba lenmang menokdangtsü aser Gaza trip nung stabilisation mission amenoktsü atema jembitsü, ta metetdaksü.

Sept 20 nü EC-i Kerala nung party balala nungi lenirtem ajurutsü

Thiruvananthapuram, September 13 (Agencies): Election Commission (EC)-i Bihar nung electoral roll tasen renemtsü atema benokba Special Intensive Revision (SIR) ya linük tesem ajak nung benoktsü atema renemba mapang ka nung parnoki September 20 nü Kerala nung yimtenren party balala nungi lenirtem ajurua senden amentsü.

Honibarnü Kerala Chief Election Officer (CEO), Rathan U Kelkar-i, September 20 nü election commission-i state nung party balala nungi lenirtem den senden amentsü, ta metetdaksü.

Iba senden nungji EC-i SIR mapatong indang metetdaksütsü.

Kelkar-i, "Onok renema alitsü atema mera balala agia inyakogo aser sentong renemtsü yongyaa atar. Iba dak sendakba

nung onoki tan ita 20 nü yimtenren party balala den senden amentsü aser SIR dak sendakba inyakyim metetdaksütsü," ta ashi.

Paisa, "State nung SIR mapatong atema kobi melii sangdong agütsütsü. State Election Commission-i records ajak digitised süa website nung upload sütsüogo," ta metetdaksü.

"Election Commission of India den senden amenba mapang nung onoki state balala nung SIR mapatong atema renemba jenjang asadangogo. Kerala nungia onoki renema aliba metetdaksüogo aser kobi melii SIR mapatong benoktsü atema sangdongtsü," ta pai ashi.

Kerala nung digital literacy 100% lir, anungji asen state nungbo iba mapatong ya melamela benoktsü, ta Kelkar-isa metetdaksü



Agra, September 13, 2025: Agra nung Taj Mahal anasa Yamuna ayongküm nung tzümessüng süngjemba sülen Agra Municipal Corporation nung inyakertermi ayongküm merüktetdang tangokba noksa nung angur.

PM Modi-i Nepal nung PM tasen, Sushila Karki nem tenüngsang agütsü

New Delhi, September 13 (Agencies): Honibarnü Ato kilonser Narendra Modi-i Nepal nung interim Ato kilonser, Sushila Karki nem tenüngsang agütsü.

"Iba ya tetsürtem nem tashi agütsüba tatishitsü ka lir," ta pai ashi.

Manipur yimtiba, Imphal nung jembidang Modi-i, akhidang nungi India aser Nepal na yimsü aser sobaliba tsütsü nungi tesendaktep liasü aser tang sorkar melenba mapang ka nung India-i kidanger linük nung aliba nübürtem nungiter, ta metetdaksü.

"India nung crore 140 tenüng nung ni Sushila Karki nem tenüngsang agütsür. Nepal nung yimjung, sorkar tashitait aser azükaru alitsü atema lai

lenmang lapoktsütsü, ta ni amanger," ta Ato kilonser Modi-isa metetdaksü.

Hokolbar aonung taoba mapang Chief Justice Sushila Karki-i interim sorkar anitsü atema Ato kilonser tenangzüka agiogo.

"Iba linük nungji Karki-i temaba menden anguba ya tetsürtem nem tashi agütsüba tatishitsüka lir," ta paisa metetdaksü.

Nepal nung social media nokdangba agi lanurtemi sorkar anema longkak sashia aitba sülen K P Sharma Oli-i aniba sorkar chirepa liasü.

Nepal Tir Paudel, Nepal sepai tongti aser longkak aiter lanurtem senden ka amenba mapang nung interim sorkar anitsü atema parnoki Sushila Karki shima liasü.

Chhattisgarh kübok Bijapur nung Maoists ana khaset

New Delhi, September 13 (Agencies): Chhattisgarh kübok Bijapur district nung security sepaitemi Maoists telungpur ana khasetogo, ta police-i metetdaksü.

Security sepaitemi telungpurtem mita aoba mapang nung telungpurtemi tama injang khaloktsü. Parnok tsüngda khatepba sülen iba tesem nungji telungpur tasü mang ana den .303 rifle ka aser bomb kar angu.

Brihostibarnüa Gariaband district nung sepaitemi CPI

(Maoists) Central Committee nung züngsem, Modem Balakrishna densema Maoists telungpur 10 khaseta liasü. Balakrishna tepsetertem nem sen crore 1 senpet agütsütsü sangdonger liasü.

Mapang shia Union Home Minister, Amit Shah-i 2026 küm March 31 anogo tashi nungbo Maoists meshi-meshia samatsütsü, ta jemibia arudar.

Taküm küm tenzüker tang tashi nung Chhattisgarh nung Maoists 243 khasetogo.



Tiruchirappalli, September 13, 2025: Honibarnü Tamilaga Vettri Kazhagam (TVK) Tir, Vijay-i 2026 küm Tamil Nadu Assembly election atema nüboyim tenzüksü atema aodang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, SEPTEMBER (RONGJUI) 14, 2025

Tepelatsü mapang

Asenok anema alidang, kaa itta alidang, takok angudang aser tangari asenok asang dang asenok pelar. Itemji meimchir ajaki ajangshiba tepela lir. Ajisüaka, item tepela mapangjibo teti atema masü saka mapang tatsüka, anogo, ita aser küm ishika asoshi dang lir. Anema alidang pelabajibo shirangdang oa adoktsü, senotsü aser jangotsü akadang pelabajia makaba mapangbo samatsü, takok angudang pelabajia tamakok angunübo jashitsü aser tangari asang dang pelabajia tangari nüngsen jembitsünübo mepelatsü. Item tepela aser tejashi ajakji alima nung alir ajaki ajangshir. Ajisüaka, taküm aser mapang tajung nung dang pelaba tepela dang nungi tajungba, tuluba, temaba aser tashi taitba tepela ka lir. Iba tepelabaji Khristan taküm ka dak aliba tepela lir. Khristan taküm ka dak aliba tepela yabo temang anema aliba agi anguba tepela masü, senotsü akaba agi pelaba tepela masü aser tangari tenüngsang agütsü dang anguba tepela masü, saka tematiba Tsüngrem nungi anguba tepela lir. Iba tepela yabo asen taküm nung kechisarina tajung aser tamajung atalokba agi aotsü aser arutsü makok. Chichiba Khristan taküm ka nung tepelabaji Tsüngrem temeim, taochi aser Pa tashi metetba ajanga arur aser taküm nung kechi tia ajurudir ajuruaka Tsüngrem nungi pila-a moi Pa den longjema aliba ajanga angur. Tsüngrem nungi anguba tepela tulutibaji Pai asenok menen ajak doker külenang ano asenok teti tepeladak alitsüsa ki renemer asenok anii arutsübaji lir. Iba tepelatsü osang tajungji asenoki Laishiba Yohan 14:3 nung angur. Asenok taküm nung kechi tensa tia ajurudir ajuruaka, iba ochi o aser teimlaji raksatsü makoktsü. Iba tamang aser teimla nung Yisu dak amanger Khristan-tem pelar. Laishiba nung timtem aser lendong mapang tetsübu aser shisabolu kokteta Tsüngrem dak amangba aser pelaba nisung taküm otsü aika lir. Item rongnungji tanü asenoki kanga lendong aser timtem tulu nung aliba mapanga tetsübu aser tejashi kokteta pelapelaa Tsüngrem nüngsang ken tena aliba Khristan taküm ana reprangdangdi. Tenaji Tsüngrem tenyar Paul aser Sila. Tenyar Mapa 16 : 25 nung ashir, " Ayaterem nung (tsüngden chiokdak) Paul aser Sila Tsüngrem dang sarasademya aser Pa nüngsang ken tenya liasü, aser tepuokdak alirtemi item sarasadem aser kentenba olaji angaa liasü." Iba mapang Paul aser Sila na ya nisung tsütsü bilemdangdi süra, ken atentsüsaba tia nung mali asü. Tena ya jungjunga züker, tepuokdak yinzü agi tetsüng alener tammang dak takdang ka nung yua liasü. Tena tiaji tejashitsüka, saka iba tejashitsü tia tamajung jagia tena dak aliba tepelaji meremsemtem. Tsüngden chiokdak amang nung tenati sarasadem aser tepela nung ken aten . Idangji, Tsüngremi iba tepuokdak sayatenya mapa tulu inyak. Menoknok tulu anak aser tepuokdak kimong ajakanokshi. Idangyongjisa tepuokdak kishi ajak lapok aser tepuokkertem alena aliba yinzütem ajak parnoksa salaadok. Itemji tesümgangtsüka ! Ajisüka, tanü asenok atemabo item sayatenya mapatem dang nungi tesümgangtsü tulutibajibo tangari temang mena züker, tsüngden chiokdak amang nung Paul aser Sila nati Tsüngrem tenüngsang ken atenbaji lir. Ibaji kecha agia masü saka parnokji chichiba Yisu dak amangertem liasü. Tena dak tanüla temeshi agi sünga alibayong tenati ajuruba tensa tia tamajung agi tena tepelaji mesamadaktsü. Alima nung alir asünungji, asenoka kenü ama dangbo malitsü. Kenünü makamait tia ajurutsü, kenünü shilumanem tia ajurutsü, kenünübo tangari maksütsütsü aser asen dak tai mali ser nung asen jashitsüsa aitsütsü. Ajisüaka, item tensa mapang tamajungtem nemji asenok mulung nung tepela ayong ama yima alibaji merosepdaktsütsüla. Asenok taküm ya Tsüngrem tanülai anishitettsüsa, asenok indangindanga ochishia alitsüla. Aji süra, kechi tia nung lidir liaka, ken nung atenba ama, asenok ajaki Tsüngrem dang pelapelaa "Kü den ya junga lir" ta shitettsü.

OLEMSABANG

Tanü putu nung arogotem kanga saksalema alitsüla

~ L. Kika Pongener.

Arogo ya asen mimchir taginuba agi tenzüka lokti ka masü; tejen putu nungi Tsüngremi shinzüka toktsüba; aser Yisu alimai arur külena pai shinzüka toktsüba; Yisu kodaki tur külen; pa dak amanga temulong meyipbapurtemi tenzüka lokti ka lir. Yisu-i ashi, "Na Peter aser iba lung manung ni kü arogo yanglutsü" (Mathi-16:18). Aser Yisu-i ashiba ama.... Pa kodaki tur külen Yirusalem nung arogo-ji asangsang nung tenzüka...."Idangji pa (Peter) o agizükertem baptitsü aser panuji nisung merijang asem shi parnok den zünglok. Aser tenyartem tesayuba, telungjem, amtsük sangsaba aser sarasademba nung parnoki akangakanga ali" (T.Mapa-2:41-42). Anungji arogo yabo tanga lokti-tentet ka ama masü, saka laishibai tuyuba aser sayuba ama anitsüla aser alitsüla. Arogo yabo yimden bangdak shilang alangba 'Putu Menden' ka ama manitsüla. Ano arogo inyakyim yabo sorkar inyakyim aser yayim (Pattern) ama manitsüla. Tanü asen lima nung lim arogotem inyakyim reprangdangra; teimba ka tanga lokti-tentet (Civil Societies) inyakyim mesuka aniba angur. Talisa, yimtsüng nung aliba arogotem teimba ka shilang alangba bangdak menden ka mesuka aniba karbo alitsü akok. Ano jila nung aliba arogotema karbo; Sorkar inyakyim mesuka ania alitsü akok. Ajisuaka arogoji laishiba tesayuba aser tetuyuba nung amendaker anitsüla.

Arogo nem inyaktsü nungloktsüba :

Yisu-i pa kodaki atutsü mapang, pa nutsüngtem aser pa dak amangertem nem nunglokja ashi..."Nenoki oang aser kin ajak nutsüngtem kümdakjang. Tebu, Techir aser Tanela Temeshi tenung nung parnok Bapti-jang. Ni nenok dang kechisa mela ajak benshitsü parnok dang sayuang" (Mathi-28:19). Yisu-i pa nutsüngtem aser pa sulen anidakertem nem nungloktsübaji 'Arogo' nem inyaktsü nungloktsüba ta angateter. Anungji arogo teinyaktsü mapa tongtipangbaji; osangtajung tenyaba; Tanela anir aruba; aser nutsüngsuba; ibaji asütsüla. Terasatsüka, tanü lim arogo aika, Khristar arogo memesuk; Yisu-i nungloktsüba mapabo tezülen agiena yur; terenlok mapa (Developments & Infractures) nung dang tuluba rangloker inyakba angur. Tanü lim arogotem aika nung terenlok mapa, benjongbentsü, aser chidiyungdiba nung; arogo rongsen teimba endokba angur. Aser ano lim arogo teimba ka nung rongsen ketdangsuba nung kanga-sa ochimashi inyakba aser lalushiponga amshiba angur.


Arogo nem agutsüba tashi :

Arogo nem agutsüba tashiji laishiba nung züngra; Yisu-i Peter dang ashi...."Ni ne nem kodak yimli sungküm-rutsü agutsütsü; aser nai kechisa alima nung alendir aji kodak nung alentsü; aser nai kechisa alima nung saladir aji kodak nung salatsü" (Mathi-16:19). Yisu-i iba tashi agutsüba ya....Peter nem dang agutsüba masü; saka arogo nem agutsüba ta angateter. Onok lanuwa asüdang, arogopur kar Bodhbar/Honibar aonung alu nung yipra tatok nangzükdaktsü; kar deobar-nu tzüma-len shishia jajaba metetra tatok nangzükdaktsü; kar ashi-auyaba puteta yimdeni senchi chira arogo nungi atsüngdaktsü. Ajisuaka, tanü putu nungbo; ashi-auyaba putetyongjia arogo nungi atsüngdaktsüba kata mali. Ano sadi külizüng agutsüba ya-a, kanga ret-reta benshia aru, saka tanübo karbo küm ana-asem apuani amai, ki ka nung külemi lia aliba, metetsümong-aka arogo-i sadi külizüng agutsüba-a lir. Akhidangbo, temeshi kiyimba külizüng agia kibong akümer ariana kar dang liasü; saka tanü putu nungbo sadi külizüng magi kibong akümer-ang kata mali kümogo. Anungji arogo-i kechisa salar aser kechisa alener....Ibaji kodak nunga salatsüsa aser alentsüsa pongpa-pongpa masü; saka kanga ret-reta benshitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laodikia nung archaeologist temi Khristan temaitsü kar ngutetogo



Laodikia nung ngutetba Roman Council hall noksa nung angur

September 13, 2025: Tawa Turkey nung archaeologist temi akhidang Rome yimli mapang Khristan^{tem} aliba kuli kar ngutetogo.

Akhidang aliba yimti, Laodikia (Laodicea) ya ya Jungkai Adok kaket nung tetshia lir. Jungkai Adok 1:11 nung Yisui Yohan dang, "Nai kechi angur, ibaji kaket ka nung züluang aser Asia nung aliba Arogo tenet; Efesa, Smerna, Pergama, Tiatra, Sardia, Filadelfia aser Laodikia dangi züluang," ta shia lir.

Tenyar Paul-ia Kolosi nunger dangi züluba shidi nung Laodikia ya mezüngpur Khristan^{tem} aliba yimti ama züngshia lir.

Archaeologist temi küm 22 tashi ali tua bushisüngdangba project ajanga tang Turkey kübok Denizli province nung Roman council hall ka ngutetogo.

Iba hall nungji council Tir aser züngsemtem tenüng zülua lir. Iba hall nungji obendangba aser yimtenren dak sendakba sendentem agi südi ta bilemer.

Excavation team nung tongti, Professor Celal Simsek-i, "Iba ya administrative center ka liasü aser iba kübok yimti tenet nungi ter tashi repranga liasü. Onoki council building nung aliba tua bushisüngdangba mapang nung temeket jaratemji tip pongusü liasü aser temalenji tip trok liasü. Tang mezüng onoki iba ama yimya nung kiojen yangluba ngutet," ta metetdaksü.

Parnokisa Rome temarener Trajan indang kürakyanglu angu, saka tekolakbo maliasü. Iba dak alia lung agi chitetba Kangki ka aser Khristan temaitsü Chi-Rho monogram ngutetogo; mezüngbuba ojang anaji Khrista olong nungi lir.

Item tebushitetba ajanga tanü Khristan^{temi} ano tali tarokba bushitsü atema jangratsü.

Jungkai Adok kaket nung Laodikia ya "telempet Arogo" ta shia Tsüngremi saaktsüdoktsü indang lir. Tanü Khristan^{tem} aika tanela nung telempet aliba mapang nung tang Laodikia nung item tebushitetba ajanga Laishiba nung telempet indang shia aliba ya asentenshir shisadangtsü atema Arogotem ajungshitsü.

Dimapur-i arur Khristan putirtem aser 'nun' tem dang ILP meshitsü

September 13, 2025: Tang sorkar temzüng tasenba kübok tang nungibo Dimapur district-i arur Khristan putirtem aser nun tem dang nungi Inner Line Permit (ILP) meshitsü.

Nagaland nung airport ka dang aliba yimti aser shishilembaba tiyongtsü, Dimapur nung ILP menüngdaki liasü, ajisüaka September 4 nü Deputy Commissioner office ajanga, tang nungibo ILP nüngdaksü, ta sangdongogo.

Temzüng tasenba kübok Khristan putirtem aser nun temi küm 3 permit atema sen 1,500 agütsütsüsa akümtsü, aser küm asem abensaba sülen renewal atema sen 500 agitsü.

ILP inyakyim ya 1873 küm British sorkari benoka liasü. Tribal nütsüng teimba aliba state tem nung ali, sobaliba aser lisopurtem maitsü kümzüktsü atema ILP benoka liasü. Nagaland dak alia Arunachal Pradesh, Mizoram, Manipur aser Sikkim state tem nunga ILP inyakyim benoka lir.

Osangbener den jembidang Arunachal Pradesh nungi Khristan putir kati, putirtem danga ILP meshitsü, saka Arunachal nungbo küm ka atema sen 100 dang asütsü, ta metetdaksü.

Brazil nung Khristan^{temi} Kibubai tenyaba wadang junga angateta lir

September 13, 2025: Tang alima tesem balala nungi missionary 400,000 shi lir; missionary teimba yokba linükji United States lir (missionary 127,000) aser tanabuba jenjang nung Brazil lir (missionary 38,000).

Küm shia Brazil nunger missionary 38,000 dak temai alima tesem balala sema Khrista osangtajung proker.

G o r d o n - C o n w e l l Theological Seminary nung religion researcher, Dr. Todd Johnson-i, "Tsüngremi kin ajak dangi oa nütsüng küm^{da}kjang, ta tenyaba wadang ya Brazil nungertemi kanga junga angateta lir," ta metetdaksü.

Osangbener den jembidang Johnson-i, "Brazil nungertemi alima nung tesem tamajungtiba aika nung Tenla ki tasen tenzüktsüba nungi tenzüka hospital tem nung tenzüka wadang inyaker, ajisüaka ibaji nisung aikati junga memetet," ta ashi.

Paisa, Brazil nungertemi mission inyakyim nunga temelenshi adokdaksür, ta ashi.

Last Call nungi Breno Vieitas-i, "Brazil nung Arogotem aintsü atema inyaker aser tanga linüktem nunga Arogo rendaktsüner. Ibayongji mission mapa nung tayongzükbatem lir ta angateta parnoki temelenshi adokdaksür," ta metetdaksü.

Breno Vieitas-i Mozambique aser Spain na nung küm 13 tashi missionary inyaka liasü.

"Missionary ka ama senotsü lenmang bushitsü atema tebilem^{tsü} tulu akaba ni bilemteter. Onok ket nung senotsü tera dang liasü, saka onoki senotsüji Mozambique nunger missionary tem den lemsatepa liasü," ta pai ashi.

Tang pai Brazil nung Arogotem dang missionary temi teka mapa balala inyakba den külemi Tsüngrem tenzü^{kba} wadanga inyaktsü ajungshiang, ta ajungmesor.

"Mapa balala inyakba den külemi Tsüngrem-a tenzü^{ktsü} nükjidongji smarter missions atema lir," ta pai ashi.

"Mission field nungi ni Brazil-i meyipa aruogo. Iba nükjidong tasen yur Arogotem ajungshitsü atema ni meyipa aru," ta Vieitas-i ashi.

"Kü nükjidongji, taruba küm aika tsüngda mission wadang nung nokdaksü atema Brazil nunger lanur missionary aika anitettsü atema lir," ta pai ashi.

"Missionary aika aniteta alima nung tesem tamajung aikati yoktsü. Karbo Europe-ia yoktsü" ta Brazil nungi Europe-i oa missionary inyaker, Rebeca Teixeira-i metetdaksü.

Teixeira ya lanur missionary ka lir. La ya Brazilian Foursquare church nungi lir aser lar kibongi tesüiba küm aika tsüngda Portugal nung Arogo aika tenzü^{ktsü}ogo.

Tang lai Europe nung tesem balala semdanga lanurtem dang Europe ya Yisu atema asütsü asoshi inyakang, ta ajungshir.

Osangbener den jembidang lai, "Kü mangdangji lanur lenirtem nem tashi agüja parnok ajungmesotsü atema lir. Portugal nung süaka, Sweden, Denmark aser Germany nung süaka ni kecha mebendanger. Tesem mashie ka nung Tsüngremi mapa inyaktsü akok," ta ashi.

Laisa, "South America nungertemi yamaji bilemer. Kibongtem aser putu balala nung alirtemi iba tangatetba nungji inyaka arur," ta ashi.

2020 küm Brazil nung aliba football stadium asem nung lanur 140,000-i The SEND sentong nung dena liasü. Ghonda 12 agiba sentong nungji lanur aikati missionary inyaktsü melungteta liasü. Online ajanga iba sentong nungji adenertema million 2 jungnüa liasü.

Iba sentong nungji Brazil nunger meyirjang aikati kintem dangi oa Khrista osangtajung lemsateptsü melungtetba temaitsü pei tsüngsem semzüka anünglen mekanga liasü.

Teixeira-i, "Mission ji item ama yimya nung inyaker; tenla agütsür tekatem, apudaker sarasademtsüba temokoktem, aser tenzü^{ktsü} atema apusoba tetsüngtem lir," ta ashi.

Asenoki Brazil ya football junga asayartem adokdak lima aser samba tsüngsang tsüngsangba lima ka ama dang bilema liasü, ajisüaka iba linük ya missionary tem jenti yokba linük ka amai tang alimai meteta küm^{dar}.

ANOGO ABEN TSÜNGREM DEN

TESANGWA NUNG JAJA-ANG

"Ne o kü tsüng asoshi milen, aser kü lenmang asoshi tesangwa lir."
~ T. Ken 119:105

Milen ya anüngdang tesangwa nung amshiba oset ka masü saka am mang nung senzürtem atema tongtipang nüngdak oset ka lir. Am mang nung milen tesangwa maka shingaia mejajatet aser kecha minyaktet. Aji oda milen sangwa koba ajanga timtem lendong ajunga nungi kümzüker yamaji Tsüngrem o ji takum tanela lenmang nung milen sangwa ama ta tenüngsang ken zülur jagi ashir.

Temeim adianutem, na aser ni iba temenen lima nung jajadang Tsüngrem kotak nungi alur ana den mesenzütsü. Saka anogoshia temenen tatitang sang sua aliba lenmang nung jaja dang aseni Tsüngrem O ji asen tetsüng asoshi milen mekümdaktsüra aser asen jajaba lenmang asoshi tesangwa mekümdaktsüra iba temenen nungji alangpet alangtsü, tanela nung yirupet yirutsü.

Iba Tsüngrem o ya asenok asoshi shi aser tanela anaprongla temenen nungi kümzü^{ktsü} akokba terajem shisatsü lir. Saka asenoki aiben pei shisatsü, ali rongsenji asen tetsüng aser lenmang asoshi milen sangwa kümdaktsür. Temeim adianu, asenoki metet nisungi yangluba mileni talangka mejangrur saka yakta aseper. Tsüngrem o koba asen tetsüng asoshi milen aser asen lenmang asoshi tesangwa lir iba ya Tsüngremi nisung nem angati agütsüba taochiji lir. Iba taochi nung teti alitsü merangdi

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimym

Tetzü

(v) kechi atalokdir ta bilemdangba, ataloktsü ta ashiba (foretell)

* Anü kanga sashia pura tzünglu yakta arutsü ta tetzü.

Tewarak

(adj) tetsür tesashi (virago)

Tewarak tetsür den aikati memedemteter.

OLONG PAITEP # 7270

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPLIN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzüngluden külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ____ tatsü - (3)
12. Tebur kidong aser zünga kasatsüngdajatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7269 TELANGZÜBA**TIPLIN :**

1. Matem 5. Anak 9. Aja 10. Amketa
11. Makur 12. An 13. Ako 14. Amtang
17. Rataka 19. Nür (Nurang) 20. Ter
21. Naira 22. Marang 23. Akak 24. Alang
27. Sü 28. Roko 29. Amar 30. Anaka

LANGTSÜNGLEN :

1. Mamar 2. Ajakataküm
3. Takotera 4. Marak 5. Aket 6. Ne
7. Atanür 8. Kangrang 15. Mangara
16. Anitaka 18. Araker 22. Masa
25. Lon 26. Nok

NAI-A YA METETTER

Sisters of St. Joseph-i September 11, 2025 nü seed balls 11,90,796 yangluteta alima otsü ka yangluogo.

Sisters of St. Joseph küm 375 abensaba tenüing nung Sisters of St. Joseph of Annecy, Visakhapatnam-i St. Joseph's College nung seed ball making sentong ka ayonga agi aser idangji World Records Union ketdangsürtem aden.

Iba sentong nung India nung St. Joseph reju 16 nungi shilem agi aser parnoki seed balls 11,90,796 yangluteta liasü.

Tanur asoba anogo nung salem osang den noksa angati adokdaksünöra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Meghalaya nung taoba Chief Minister D.D. Lapang süogo**Shillong, September 13, 2025**

(Agencies): Taoba Meghalaya Chief Minister Dr. Donwa Dethwelson (D.D.) Lapang arishi küm 91 nung alima nungi pilaogo.

September 12, 2025 aonung Bethany Hospital, Shillong nung pa asü.

Meghalaya nung Chief Minister pezüben tashi inyaksang aser Nongpoh nungi mapang talangka MLA inyaksang Dr. Lapang ya state nung lennir tongti ka liasü.

Pai küm 50 jungnüa state yimsüsüba wadang balala inyak aser pai kanga dang ajemalua

aser bendanga agüja public tenzüko.

D.D. Lapang ya April 10, 1934 nü Ri-Bhoi district nung aso. Pai mezüing lenmang yangluba nung aayanger ka ama inyak aser iba sülen Sub-Inspector of Schools inyak.

1972 nung pai politics nung tetsüing ajemok aser idangji pai independent candidate ka ama toktepa liasü. Iba sülen pai Indian National Congress (INC) nung aden aser menden balala inyak.

Dr. Lapang-i 1992 aser 2010 tsüingda mapang balala nung kümsük pezü atema Chief Minister inyaka liasü. 2018 nung

pai Congress toktsür National People's Party (NPP) nung aden.

Pa arishi küm nung tain süaka October 2024 tashi Adviser to the Government of Meghalaya ama inyaka aru aser arishi küm 90 nung iba mapa nungi sodi agi.

"Lapang ya shisatsü agütsür ka, len anir ka aser tebu ka ama liasü. Pai Meghalaya nunger bendanga agüja tenzüka teti bilemtettsü" ta taoba MP Vincent H. Pala-i ashi.

Dr. Lapang-i pa kinungtsü Amethyst Lynda Jones Blah toktsür alima nungi pilaa ogo.

PM Modi-i Northeast atema bilemetsür: Tipura CM**Agartala, September 13,**

2025 (Agencies): Prime Minister Narendra Modi-i Northeast den teti sendaktepa aruba atema tenüingsang agütsür ta Tripura Chief Minister Manik Saha-i tanü ashi.

Prime Minister shingaia pa ama Northeast atema bilemetsüba maliasü ta pai ashi.

"Prime Minister-i Manipur semdang aser Manipur tensa junga lir. Tang tashi nung Prime Minister shingaia Modi ama Northeast atema süoki ia meblemetsü. Narendra Modi-i Prime Minister akümba sülen Northeast 60 ben tema semdangogo" ta CM Saha-i ashi.

Modi-i September 22 nü Tripura semdangtsü aser

idangji Mata Tripura Sundari Temple complex lapoktsütsü aser puja asütsü ta paisa ashi.

"Alima nung Shakti Peeths 51 lir aser item rongnung Tripura nung aliba Mata Tripura Sundari Temple ya ka lir. Prime Minister-i aginüba ama onoki iba tekülem ki yanglushiogo. Pai tekülem ki lapoktsütsü aser Puja asütsü" ta CM Saha-isa ashi.

Ao Officers' Telungjem tenteta mezüing...

(TAPAK 1 NUNGI...)

Asen chir kin 9-10 tashi lir, talisa anüdoklen alir kintem asoshi asenoki khuret abentsü tim, ta ashi. Tanü Naga nunger tulur aika machimajemtsü ajanga anojungi taküm laluba aika ataloker, anungji, asenokbo item chitiyungti nungi jenbua alitsü asoshi tekümdangtsü olen ka lemsatet.

Ao Sendenisa AOT nem inyakdaksünüba ana - mezüingbuba nung, Ao oshi wazüka aser kümzüka ayutsü asoshi "Ao Riju" (Ao Academy) nung temulung agütsütsü asoshi aser tanabuba nung, tetoktepa (competitive exams) balala nung Aotsür/Aor adoktsütsü asoshi mapatong kar inyaksü tezüluba nung agütsüogo, ta tirisa metetdaksü.

Paisa Ao lima timtem ajuruba ka lemsatetdang, Ao litsü nung sarkar mapatong balala inyakbatem ya mapang shitak nung taginüba ama kata merenemteter, aji oda, lokti balalai ola adok nung dang terara arakzür, anungji, mapang shitak nung mapa tajung inyaktettsüsa nenoki shilem agidaksünür, ta mepishia ashi.

MLA & Advisor, Tongpang Ozüküm-ia mapang tatsüka agidang, Ao Riju (Ao Academy) aser Shisa Riju koba tetoktepa balala asoshi tejangrartem nem coaching class agüja arur, item nungji temulung agütsüdaksünür, ta ashi. Ao oshi wazüka ayuba nung Jungli-Mongsen ta kecha telemsa makai ochiba nung Ao oshi wazüka ayuba maparen inyaksü asoshi paisa ajungshia liasü.

MLA Nuklutoshi-ia mapang tatsüka agia jembidang, Tuli nung aliba train station ya mapa

kümtetra yangi tajangzük aisü sentaka lir, ta ashi. Iba den ano Tuli lenten mesüra tzürang lenten len tayimtsü senzüdak (airport) lapoktetsüsa ngujem tulu lir, anungji, iba mapa asangsang akümtsü asoshi külemi yaritepa inyaksü tebilemba ka lemsatet.

Sentong nung "kü lima, kü khu" omen dak ajemdaker Dr. Sentitula, IFS, Mokokchung DFO-i onük tajung aika bener arua lemsatet. Sentong nung Asangla Imti, IAS Secretary, GoN; Asangba Chuba Ao, IAS, Joint Secretary, Ministry of civil aviation GoI; Tianaro Jamir, Tir, Watsü Mungdang; I. Anungba Sanglir, Additional Director, F & CS, GoN & Sentongtonger luden züngsem parnokia shilem balala agia jembi. ABAM executive secretary, Rev. Temsu Jamir-i Aor officers asoshi mejeta sarasademtsü. CTC nung azünger Ao kaketshirtemi ken tajung ka tena tesenteper ajungmeso. Iba sentong MTBA Sr. Pastor, Pongen Longchar den temoatsü meshia sarasademer tenzü aser Secretary, ABAM Women Ministry T. Arenla Longkumer den tenüingsang agüja sarasademer tembang.

Bangzüing itemi renem

1. Ao Officers' Telungjem (AOT) tamendakdakji Tsüngrem O aser Pai nungloktsüba Khuret bena tabensaba nung/inyaksangshitsü nükjidong yur tentetter.

2. Asen sobaliba, tamangba yimsü aser tajangshiba kulitem nung ajemdaker libaliru tazüokba,

shisatsü angazükba aser inyaksangshi nung techiraba

koba ajanga tajungtiba aser tematiba ajangzüksü asoshi "THE GLOCAL CENTRE OF EXCELLENCE" (tajungtiba aser

tematiba ka ajangzüksü asoshi tangazükdak) yangertsü.

3. O aser mapa kasa lirumedem nung asen kin officer-tem pei tenzüka wadang koba tensa nungsa lidir/ inyakdir, "Kü Lima Kü Khu" ta tangatetba nung bendanga agüja meranga, tatishitsü kuli tajung yuja nübur tajangzük ngudakja Tsüngrem tsüngdang tasazük shitak yutetta tenzüksü.

4. Ao Riju terenlok asoshi amalitep, tesentaktep aser teyaritep akatsü.

6. VIKSIT Bharat 2047 Developed Mokokchung nung AOT-ia shilem agitsü.

AOT ketdangpur itemi shim

1. Tir: KAOT Tir
2. Tatong Tir: (i) MAOT Tir (ii) DZAOT Tir
3. Tezülur: KAOT
4. Repsem zülur: (i) MAOT Tezülur (ii) DZAOT Tezülur
5. Sen Zülur: KAOT Sen zülur
6. Sen Zülur Temedanger: (i) MAOT Sen zülur (ii) DZAOT Sen zülur
7. Kimen: KAOT Kimen


Sanen luden:

i. KAOT, MAOT aser DZAOT unit shia nungi nübu pungu (5). HQ shia den federating HQs/units nungi tetemsü nübutem densema shimtsü.

ii. Nagaland nungi atena or officer-tem nungi nisung ana (2). All Indian Services aser Allied Services nungi nübu ka (1) aser tanga central services nungi nübu ka (1).

MOLUNGNEN O

"Akümüli temulung süa lir, temeim obala kotak nung alitsü ogo."



10th May 1935 ~ 30th August 2025

Onok asür Rev. Takumeren'er (Mangmetong) kinungertemi, pa mapang talangka shiranga aliba mapang aser asünü tashi nung kija, fellowship, lokti tentet balala aser Arogotem shirnokisa sarasadem, alirongsen aser tsüngdong arua onok nongita yariogo, nenok ajak dang kanga pelaba lemsateper.

Nisung ajak dang mejeta tepelaba melemsatepteter saka onoki item lokti tentettem dang parnok mapa tajung asoshi pelaba lemsatepner:

1. Ao Baptist Arogo, Padumpukhuri

2. Ao Baptist Arogo, Aoyimkum

3. Purana bazaar B Ao Baptist Arogo, Dimapur

4. Ao Baptist Arogo, Mangmetong

5. Ao Baptist Arogo, Longkhum

6. Ao Baptist Arogo, Kumlong, Mokokchung

7. ABAM, Impur

8. Ao Baptist Arogo, Kupza

9. Ao Baptist Arogo, Artang

10. Ao Baptist Arogo, Longmisa

11. Nokhu Noking Baptist Church, Noklak

12. Satsu Baptist Fellowship, Mangmetong

13. Ao Senso Telongjem, Padumpukhuri

14. Dimapur Area IEF

15. Mangmetong Fellowship, Aoyimkum

16. Longmisa Village Council
17. Martoshi Memorial Mission Project, Longmisa, Dimapur Unit

18. Dimapur Longmisa Senso Telongjem

19. Dimapur Longmisa Tamang Telongjem

20. East Dimapur Area Mangmetong Fellowship

21. Tongpok Semchir Pongen Mongdang, Mangmetong, Mangmetong Unit Dimapur

22. Tongpok Semchir Mangmetong Pongen Kidong, Mokokchung Unit

23. Tongpok Semchir Mangmetong Pongen Kidong, Dimapur Unit

24. Mangmetong Senso Telongjem, Dimapur, Chumoukedima, Niuland.

25. Jungli Kindong, A khel, Mangmetong

26. Pongen Kidong, A khel, Mangmetong

27. Tongpang Mepu, Mangmetong

28. Mokokchung District Badminton Association

29. APAT, Mokokchung

Tajungsang Tsüngremi nenok ajak molamoshia moajangma.
~ Temeim Chirnur, Semchisemnur aser Anükapangtem.

MULUNGNEN O



Aso: 02.05.1972

Asü: 06/09/2025

Asür Aotemsu

Temeim kinungbu ajungben iba akümüli wadang tembanger mulung zürep mapang, kidang kimang, kiyonger, senso nübur, bendang balala nungi aser Civil Hospital Mokokchung (IMDH) nung doctor & nurse shirnokisa sarasadem den nübu aser rongsen agi yaritepogo, nenok ajak dang kanga pelaba iba sabang ajanga lemsateper. Tsüngremi nenok mapa tajung asoshi talubusa moatsütsü onok tamang sarasadem.

~Temeim kinungtsü aser chirnurtem.

MENUNGRA BILEMTETER



14.9.2016 - 14.9.2025

Asür Mrs. Areninla Mongsenyimti

Pongmang ka ama tang bilemer, saka nai onoki toktsür or tanü 14/9/2025 nung küm toku (9yrs) tashi arudang tanüa na onok den ali ama bilema na mamateter. Ne mapa tajung, sayubentsü o tem bilemteta na menungra iba anogo sarasadema amonger.

~ Temeim kinungbo, chirnur aser kinungertem

Russia totsü aliba atema tariff agitsü US-i ayongzük

Washington, Rongjui/ September 13 (Agencies): Group of Seven nations' finance ministers tem Hokolbranü ajurutepa Russia nem tenokdangba talila agütsütsü aser Ukraine den maneni raratsü atema Russia nem tashi agütsüba linüktem dang saru tali meshitsü asoshi sensaksemba mapang US-i Russia dang totzü alirtem dang saru meshitsü ayongzükogo.

Canada Finance Minister Francois-Philippe Champagne lenisüba nung G7 senden amen, koba Ukraine nung rara anentsü atema Russia tali nongshitsü asoshi jenjang agitsü atema sensaksemtsü asoshi agia liasü, ta G7 tir Canada-i sangdong ka ajanga metetdaksü.

Minister temi, Ukraine nem teyari agütsütsü atema Russia indang rongsen sota alibatem amshitsü asoshi takaratiba nung sensak asemtsü mulungtepogo, aser iba den Russia nongshitsü atema rongsenketzüng nung ano jenjang talila agitsü sensaksemogo, kong Russia maneni raratsü atema teyari agütsürtem dang saru meshitsüba densema lir, ta kasa sangdong ajanga metetdaksü.

U.S. Treasury Secretary Scott Bessent-i, finance minister tem dang ashiba agi, Russia dang nungi totzü alirtem dang saru meshitsü atema parnoka US den adentsüla. U.S. Trade Representative Jamieson Greer-ia kasa tebilemba ya lemsatepogo.

"Raratsü atema Putin nem rongsen agütsüba ya tera nung nokdangtsü asoshi longjemmer inyakba ajanga dang iba rara ya tembangdaksütsü asoshi

rongsenketzüng nung tali nongshitetsü," ta Bessent aser Greer nati ashi.

Bessent aser Greer nati, tenokdangba tali agütsütsü atema senden nung bangjemba aser Russia indang rongsentem Ukraine ajangzükdaksütsü asoshi amshitsü atema lenmang bushitepba ya pelashishia agizüker, ta külem sangdong ka ajanga metetdaksü.

Hokolbarnüsa U.S. Treasury otongdar kati G7 aser European Union nung parnok den sendaktepa aliba linüktem dang, Russia nungi totzü aliba anentsü atema tali nongshitsü asoshi China aser India nungi osettem nung saru tapet benoktsü ayongzükogo.

Russia dang totzü aliba anentsü atema New Delhi tali nongshitsü asoshi tir Donald Trump-i tariff shilem 25 talila benokogo aser iba ajanga ajak senteper India indang osettem nung tariff shilem 50 kümogo. Iba ajanga linük ana tsüngda shishilembaba tsütsü mangatettep adokogo.

Ajisüaka Russia dang totzü aliba atema Trump-i China nungi bener aruba osettem asoshi saru talila memeshi-i lir.

Kasa mapang nung Trump-i, pai Russia tir Vladimir Putin matatet kümogo ta ashi, saka tenokdangba tasen agütsütsübo amokmeren masü.

Trump-isa, Puti-i rara anentsü atema jenjang tapet magiba asoshi tezü adngba lemsatepogo. Pai ashiba agi, Russia nongshitsü atema bank aser totzü nung tenokdangba tali agütsütetsü, saka Europe nung aliba linüktemia shilem agitsüla ta ashi.

Nepal nung March 5 nü election agitsü



Nepal nung azütokshi lendong tulu ataloka nisung 50 dak tema asüba sülen anogo pongububa ajungba mapang Sushila Karki linük indang mezüngbuba tetsür interim Ato Kilonser asütsü shimogo aser talenba balala agütsür aliba salaja arudar. Birganj nung curfew agintsüba sülen dokan balala lapoka inyaksangshiba noksa nung angur.

Kathmandu, Rongjui/ September 13 (Agencies): Nepal nung taruba küm tetenzüklen election agitsü ta tir-i mettedaksüogo. Linük nung otsüsütsüsa lanurtemi anir longkak aita sorkar atsüngtokba sülen tang mezüngbuba tetsür Ato Kilonser kati anir interim sorkar ka tenteter aliba mapang tir-i iba osang ya sangdongogo.

Interim sorkar len anitsü atema taoba chief justice aser ochi mashi anema nokdaker Sushila Karki shimba sülen ghonda ishika lir tir Ramchandra Paudel-i Hokolbar aonung menor menden 275 atema parliament loksaogo aser election taruba küm March 5 nü agitsü ta metetdaksü.

China aser India na yongtsü nung aliba linük kong nütsüng yongsü million 30 lir, iba linük nung anogo ishika tejakdang Gen Z-i anir longkak aitba

ajanga azütokshi lendong tulu atalokba sülen tanem tanemi süngjema odar.

Ketdangsürtemi Honibarnü nungi tenzüka talenbatem salatsüdar aser linük yimtiba Kathmandu nung curfew aser tenokdangba balala agütsür aliba agintsüogo. Ajisüaka lendong ataloktsü ta tsübua bilemba tesemtemi maneni nüburtem meyoker.

Social media tenokdangba agütsüba atema iba longkak aitba ya tenzük, saka lia lia ochi mashi inakyim aser yimden yimsüsürtem yongtsüng nung tejak repranga maongka balala agütsütepba anema nüburtemi nokdak tenzük. Parnoki parliament, yimden yimsüsürtem ki aser public kitem nung mi senoktsü aser Ato Kilonser KP Sharma Oli kangshia mapa nungi anendakja liasü.

Hombarnü nungi tenzüka

longkak aitba mapang longkak aiter 21, tepuoker teku, sepai asem aser tangar 18 densema ajak senteper nisung 51 süogo, ta police-i ashi. Linük kübok tepuokdak balala nungi jena aoba tepuoker 1000 shi meyipa ogo, saka ano tepuoker 12,500 dak tema jenshia senzüdar, ta police-i ashi.

Rongsenketzüng nung timtem aliba aser yimden yimsüsürtem aser parnok chirnurtem kanga ka-ita litepba mapang tanungba purtem kanga kangshitepba agi Nepali nunger longkak aitertem kanga temulung mesüi liasü.

Lanurtem aikati, mapa manguba aser talisa yimdak yimsüngtem nung tinyaktsü maliba ajanga kanga temulung masüba lemsatepogo, iba ajanga nisung aika Middle East, South Korea aser Malaysia nungeri mapa inyaki aoer.

Tir Paudel, army chief Ashok Raj Sigdel aser longkak aiter lenirtem tsüngda anogo ana tashi sensak asemba sülen Karki ya interim Ato Kilonser asütsü shima liasü.

Karki shimba ya kidangi India-i pelashishia agizükogo aser Ato Kilonser Narendra Modi-i X ajanga tenüngsang agütsüogo. Ajisüaka PM tasen shimba dak sendakba nung China-i kecha telangzüba agüja mali, saka parnoki longkak aitba mapang azüzüka inyaksangshiteptsü, nüburtem kümzüka yutsütsü ayongzüka liasü.

Hong Kong Open: Satwik aser Chirag na final-i iogo



Satwiksairaj Rankireddy & Chirag Shetty

Rongjui/September 13, 2025 (Agencies): India nung nungtugu badminton tebur tarep asayar Satwiksairaj Rankireddy aser Chirag Shetty nati tang asaya aliba Hong Kong Open tebur tarep asaya semifinal nung Chinese Taipei nung tarep B Lin aser Chen Kwan Cheng na koka final-i iogo aser iba asayamung akoksü asaya ka dang anunga lir.

Shetty aser Rankireddy nati 21-17, 21-15 ta straight game nung Chinese Taipei nung tarep Lin aser Cheng na ya koka final asayatsü asoshi

maongka ngutetogo.

Eighth-seeded India nung tarep ya China nung Liang Wei Keng aser Wang Chang na aser Chinese Taipei nung Fang-Chih Lee aser Fang-Jen Lee nung asayaba sülen takoker den final asayatsü.

Satwik aser Chirag na atema iba asaya akokba ya ano final ka tongtetba dang nungi tongtibatba lir. Tena küm ka tepeyong shitemang aser tekelok shisatsü ajak tendanga tia tensa balala ajangshia arur tang asendenshir takok ngua asaya odar.

Küm ka tejakdang India

nung tarep ya Olympic nung Malaysia nung Aaron Chia aser Soh Wooi Yik nati tsükdaktsüba sülen temulung raksatsüka medal mengutet.

Ajisüaka tenati taküm World Championships nung bronze medal ngutetogo aser Saina Nehwal o PV Sindhu na sülen India nung tarep aser kija asayartem rongnungi tenati dang World Championships nung medal ka dak tali nguteta lir.

Olympics sülen asayayonga aruba mapang Satwik tekatsüla yiruba ajanga masayateti aküm aser kasa mapang nung February ita tebua temulungjang mapa minyaki küma süatok.

Iba sülen pa meyipa arur asaya tenzük saka chickenpox adokba ajanga ano mapang tatsüka süzükdaktsü. Chirag-a teberem yiruba ajanga junga masayatet aser iba ajanga tena takok monguteti asaya aruogo.

Anungji Honibarnü takok anguba ya tena asoshi kanga tongtibatba lir aser iba ajanga takok asoshi tena tetsüraba aliba sayur.

NSF Martyrs Memorial Trophy tenzükogo

Kohima, Rongjui/September 13 (TYO): 25buba NSF Martyrs Memorial football Trophy September 13 nü Indra Gandhi Stadium Kohima nung tenzükogo.

Asayamung lapokba sentong nung Minister for Rural Development and SIRD Nagaland, Metsubo Jamir alakteta jaoker liasü aser ketdangsürtem, asaya janrartem, kaketshirtem aser football asayartemi shilem agia liasü.

Sentong nung o jembiba mapang Minister-i, iba asayamung ya kanga tongtibatba lir kechiyong iba ya asür Kekuojalie Sachü aser asür Vikhozo Yhoshü nati tena taküm bendanga agütsüba temaitsü lir, ta ashi.

Paisa, iba asayamung ya saisabong sentong ka dang masü saka telongjem, menungra bilemtetba aser progressive activism temaitsü lir ta ashi, ta ashi

"Tanübo football asaya ya südoksünemtsü atema dang masü saka yimayimbong yanglushitsü atema sabang tajung ka aser iba yagi arrtsü adena kishitem lapoktsür," ta Minister-i ashi. Pai lanurtem dang iba asaya nung professional akümstsü aser international jenjang nung tangari jangjatsüsa inyaktsü ajungshia liasü.

Sentong nungsa Angami Students Union Diezevisie Nakhro aser Naga Students Federation tir Mtseisuding Heraang natia o jembia liasü.

Asayamung lapokba sentong ya Keneido aser Asno na lenisüba nung agi.

Honibarnü mezügbuba asaya nung Chedema Village Youth Organisation-i goal 7-0 agi Amigos FC Tesophenyu koka liasü.

September 15 nü asaya:

1. Mez & Co vs Kohima Bible College @12:30 am
2. Sadar Hills FA (Manipur) vs Wolves FC @ 4:30 pm.

Real Madrid defender Rudiger hopta ishika masayatettsü

Rongjui/September 13, 2025 (Agencies): Real Madrid centre-back Antonio Rudiger tetsüng tabelen nung tetsü yiruba sülen hopta ishika masayatettsüsa kümogo. Germany nung arishi küm 32 tain asayar ya Hokolbarnü training agiba mapang yiru aser osang ajanga ashiba agi, pa ita anashi masayatettsü.

Club-i sangdong ka ajanga ashiba agi, scan agiba sülen Rudiger indang rectus femoris muscle yirur aliba ngutetogo. Real Madrid-i pa kodang nungi asayatettsü iba idang osang tejangja magütsü, saka Spanish outlet AS-i pa kanga mejungi yiruogo, ta ashi. Taoba küm yiruba ajanga tetsükdaktsü balala adokaka asayar tejen ya asaya 55 nung asayaogo saka taküm La Liga nung asaya ka nung dang asayar lir.

Rudiger yiruba ajanga Real pur centre-back nung asayatsüpur agi anünga kümogo, ajisüaka club-i taküm Bournemouth nungi arishi küm 20 tain Dean Huijsen alizüka lir. Osang ajangasa Real Madrid puri season tembangba sülen Liverpool nungi France nung international asayar Ibrahima Konaté anir arutsü tenük yokdar.

Madrid pur La Liga nung taruba asaya Real Sociedad



Antonio Rudiger

nung oa asayatsü lir aser Champions League nung mezügbuba asaya Mongolbarnü Marseille den asayatsü lir. Rüdiger maliba mapang coach-i defensive lineup melenshitsüsa akümstsü.

Kasa mapang nung Jude Bellingham, shiba tapur yirur timtema arua liasü, pai Club World Cup tembangba sülen surgery agitsü telemetba agia liasü. England nung midfielder ya Real Madrid nung rehabilitation tenzükogo aser season tatemi meyipa arutsü imlar.

Rudiger aser Bellingham na maliba mapang Real Madrid pur team nung asayar shirnok ali agi achayanga atatsüsa akümstsü, kechiyong parnok domestic aser Europe naprongla nung asayamung balala asayatsü lir.

ISSF World Cup: Esha-i 10m Air Pistol asaya nung gold angu

Rongjui/September 13, 2025 (Agencies): India tsürtem rongnungi shooter Esha Singh-i, Honibarnü Ningbo, China nung tang asaya aliba ISSF World Cup nung kanga junga asaya-a 10m air pistol event nung gold medal nguogo.

Singh-i, point 242.6 ngua gold medal angu, aser külem India tsür Rhythm Sangwan-ia point 179.2 ngua la pongububa nung tembanga liasü.

"Ni kanga pelar kechiyong iba ya mezügbuba asaya lir aser ni World Cup nung gold ka nguogo. Kü nükjidong kar tongtetba atema ni kanga pelar," ta Singh-i ashi.

"Taküm küm atema world championship ya taruba asayamung tulutiba lir. Iba atema onok kanga meranga training agidar aser Cairo nung India team-i kanga junga

asayaba nenoki angutsü," ta laisa ashi.

Esha aser la indang teammate Rhythm Sangwan napronglai point 578 ngua final atema qualify süa liasü.

Qualification nung Yao-i point 584 ngua la temaba jenjang nung liasü. Kasa mapang nung India tsür Palak Gulia shiba ranking points atema toktepba liasü lai point 586 angu. Surbhi Rao-ia point 568 ngua la 25buba nung tembang.

Final nung shooter ti toktepba mapang Rhythm-i asaya kanga tashi ita tenzük aser mezügbuba series nungbo la temaba jenjang nung liasü aser Esha tanabuba jenjang nung liasü.

Asaya tom tonga aoba mapang Esha temaba jenjangi atu aser Rhythm pongububai asepzüka alu, aser la asaya idakji dang tembang liasü.

Elimination asayaba mapang India tsür anaprongla yagi süngjemshir kanga junga asaya liasü.

Rhythm-i 15benbuba akhangba mapang 10.8 ngua la khien atema pezüubuai atu saka shot 18buba nung tsükatok.

Ajisüaka Esha-i maneni kanga junga asayayonga atu aser kanga dang tongtibatba mapang nung 10.7 anaben nguteta Yao-i la nongshia asayaba kokteta liasü.

Lai point ajak senteper 242.6 ngua 0.1 agi China nung shooter dang nung yagi timba liasü aser gold medal angu.

Maneni tebur 25m rapid-fire pistol event nung Bhavesh Shekhawat 22buba nung aser Pradeep Singh Shekhawat 23buba nung tembang liasü. Tenapronglai point 575 angu. Mandeep Singh-a point 562 ngua pa 39buba nung liasü.



NLA Badminton Stadium Kohima nung September 13 nü tetsürtem asoshi mezügbuba Badminton Tournament tenzükba sentong nunga KDBA tir Kovi Meyase aser State Mission Director of SBM (Urban) na den asayar aser ketdangsürtem tangokba noksa nung angur.

BILEMDANGANG

"Shisakari mepetmesü nungi pila alitsü meranger."